



粵海關志卷四

前代事實三


元

世祖定江南凡鄰海諸郡與番國往返互易船貨者其貨以十分取一麤者以十五分取一以

市舶官主之

王圻續文獻通考

至元十五年八月辛未詔行中書省唆都蒲壽康等曰諸番國列居東南島嶼皆有慕義之心可因番舶諸人宣布朕意誠能來朝者朕將寵



禮之其往來互市各從所欲元史世祖紀

至元二十三年十一月改廣東轉運市舶提舉

司為鹽課市舶提舉司隸廣東宣慰司元史百官志

至元二十五年禁廣州官民毋得運米至占城

諸國出糶元史食貨志

至元二十九年命市舶驗貨抽分中書省定抽

分之數及漏稅之法賣者細色於二十五分之

中取一麤色於三十分之中取一免其輸稅其

就市舶司買者止於賣處收稅而不再抽漏船

物貨依例斷沒二十年又定市舶抽分雜禁凡

二十一條元史食貨志

至元三十年四月廣東置市舶司元史世祖紀

至元三十年立海南博易提舉司至大四年罷

之禁下番船隻延祐元年弛其禁改立泉州廣

東慶元三市舶提舉司每司提舉二員從五品

同提舉二員從六品副提舉二員從七品知事

一員元史百官志

至元三十一年十一月罷海北海南市舶提舉

司

元史世祖紀

元貞二年八月丁酉禁舶商毋以金銀過海諸

使海外國者不得為商

元史成宗紀

至大二年罷行泉府院以市舶提舉司隸行省

四年又罷之延祐元年復立市舶提舉司仍禁

人下番官自發船貿易回帆之日細物十分抽

二麤物十五分抽二七年以下番之人將細絲

銀易於外國人并提舉司罷之至治二年復立

泉州慶元廣東三處提舉司申嚴市舶之禁三

年聽商貿易歸徵其稅泰定元年諸海舶至者

止令行省抽分

元史食貨志

延祐七年五月辛卯遣使權廣東番貨

元史仁宗紀

元世祖嘗立提舉司尋罷至英宗至治六年遣

使權廣東番貨乃復立之聽海商貿易歸徵其

稅順帝元統六年罷廣東提舉二司至正二年

復立廣東提舉司申嚴市舶之禁三年總貿易

歸征其稅

郡國利病書

市舶禁金銀過海又禁香木又禁廣州官民毋

得運米至占城諸番出糶違者罪之至官自具船給本運人入番貿易諸貨其息以十分爲率官取其七民得其三仁宗延祐七年以下番將絲銀細物易於外國罷市舶司提舉司禁賣人下番貨然順帝時中書省發兩艘船下海通番爲皇后營利續文獻通考

合并市舶轉運司 至元二十三年三月御史臺承奉中書省劄付爲盧右丞建言市舶等事移准上都中書省咨六月二十九日本省官奏

過內一件這課程的勾當裏兩件兒勾當有一件勾當盧市舶司的勾當係官錢裏一十萬定要了他著海船裏交做買賣行別箇民戶做買賣的每休交行麼道奏來去近衆官人每老的每等官司做買賣的罷了百姓做買賣的每市舶的勾當做者依著在先體例裏要課程抽分者市舶司根底轉運司裏合并道來麼道奏呵那般者麼道聖旨了也欽此元典章

市舶則法二十三條 至元三十年八月二十

五日福建行省准中書省咨至元二十八年八月二十六日奏過事內一件南人燕參政說有市舶司的勾當是國家大得濟的勾當有在先亡宋時分海裏百姓每船隻做買賣來呵他每根底客人一般敬重看呵咱每這田地無用的傘磨合羅磁器家事簾子這般與了博換他每中用的物件來近來忙兀臺沙不丁等自己根尋利息上頭船每來呵教軍每看守著將他每的船封了好細財物選揀要了爲這般奈何上

頭那壁的船隻不出來有咱每這裏入去來的每些小來爲那上頭市舶司的勾當壞了有如今亡宋時分理會的市舶司勾當的人每有也委付著那的每市舶司勾當教整治呵得濟有留狀元也說來市舶司的勾當亡宋時分限大得濟來如今壞了有那時分理會的市舶司勾當那箇根底問著行呵大得濟有麼道說有奏呵是那般也者那人每根底說話者是呵行者麼道聖旨了也欽此訪聞得留狀元

稱知市舶人員李晞顏移江浙准行省咨根訪到前行大司農司丞李晞顏報到亡宋抽分市舶則例合設司存關防情節備細令行泉府司比照目今抽分則例逐一議擬於後及令知會市舶人李晞顏前去咨請照驗事准此令李晞顏報到亡宋市舶則例會集到各處行省官行泉府司官并留狀元及知市舶人李晞顏議擬到下項事理于至元三十年四月十三日奏過事內爲江南地面裏有的市舶司上頭去年賽

因囊加歹狀元等題說在先亡宋時分市舶司的錢物多出辦來自歸附之後權豪富戶每壞了市舶司的勾當出辦的錢物入官限少有道是呵亡宋時分市舶司勾當裏行來的蠻子李晞顏小名的人他根底教來商量呵怎生奏呵那般者聖旨了來那人根底教來了衆人與理會得的每一處商量來如今合整治市舶司勾當的有二十三件勾當商量來奏呵那般者行者聖旨了也欽此都省今將合行逐項事理開

坐前去咨請欽依禁治施行 一議得市舶抽分則例若依亡宋例抽解竊恐舶商生受比及定奪以來止依目今定例抽分麤貨十五分中一分細貨十分中一分所據廣東温州澈浦上海慶元等處市舶司舶商回帆已經抽解訖貨物並依泉州見行體例從市舶司更於抽訖貨物內以三十分為率抽要舶稅錢一分通行結課搬販客人從便請給文遣買到已抽經稅貨物於杭州等處貨賣即於商稅務內投稅憑所

齋文遣數目依例收稅驗至元二十九年杭州市舶司實抽辦貨物價錢於杭州商稅務課額上依數添加作額恢辦將杭州市舶司革罷將元管錢帛等物行泉府司明白交收為主為此於至元三十年四月十三日奏過事內一件江南地面裏泉州上海澈浦温州慶元廣東杭州七處市舶司有這市舶司裏要抽分呵粗貨十五分中要一分細貨十分中要一分有泉州市舶司裏這般抽分了的後頭又三十分裏官要

一分稅來然後不揀那地面裏賣去呵又要稅
有其餘市舶司裏似泉州一般三十分要一分
稅的無有如今其餘市舶司依泉州體例裏要
者溫州的市舶司并入慶元杭州市舶司并入
杭州稅務裏的怎生商量來奏呵那般者聖旨
了也 一議得拘該市舶司去處行省官行泉
府司官市舶司官在先坐往勒令船商戶計梢
帶錢本下番回船時將貴細物貨賤估價錢准
折重取利息及不依例抽解官課又通同隱瞞

虧損公私爲此於至元三十年四月十三日奏
過事內一件行省官人每行泉府司官人每市
舶司官人每百姓每的做買賣去的船裏交梢
帶著自己的錢物去回來呵那錢物內不與官
私抽分私下要有那船每也則他每占著抽分
全不交與官有今後這般百姓的船裏梢帶去
的禁治呵怎生不揀是誰別了這言語梢帶將
錢物去呵有人告呵將那錢物斷沒了把他每
重要了罪過教勾當裏出去了首告的人根底

斷沒了的錢內三分中一分充賞與呵怎生商量來奏呵是也那般者聖旨了也 一議得使臣并大小官吏軍民人等因公往海外諸番勾當皆是官司措辦氣力船隻前去卻有因而做買賣之人今後回船之時應有市舶物貨並仰於市舶司照例抽分納官如有進呈希罕貴細之物亦仰經由市舶司見數泉府司具呈行省行省開坐移咨中書省聞奏仍仰今後應有過番使臣卻不得以進呈物貨爲名隱瞞抽分如

違並以漏舶治罪物貨沒官爲此於至元三十年四月十三日奏過事內一件或是這裏差去的使臣每那裏拜見上來的麼道因著那般夾帶著百姓每的錢物不與官司抽分那般行的多有今後但那來的依著百姓每的體例裏要抽分若有拜見的物呵那裏行泉府司裏行省裏明白這些箇物件拜見上去麼道寫了數目把那寫來的數目與將這裏來者似在前一般不與抽分背地裏隱藏上來的有罪過者商量

奏呵是也那般者聖旨了也 一議得和尚先生也里可溫答失蠻人口多是夾帶俗人過番買賣影射避免抽分今後和尚先生也里可溫答失蠻人口等多過番興販如無執把聖旨許免抽分明文仰市舶司依例抽分如違以漏舶論罪斷沒爲此於至元三十年四月十三日奏過事內一件和尚先生也里可溫答失蠻每但做買賣去呵依著百姓每的體例裏與抽分者商量來奏呵這的言語不會了來那甚麼擬定

那般者聖旨了也 一諸處市舶司船商每遇冬訊北風發時從船商經所在船司陳告請領總司衙門元發下公據公憑並依在先舊行關防體例填付船商大船請公驗柴水小船請公憑願往番邦明填所往是何國土經紀不許越過他國至次年夏訊南風回帆止赴原請驗憑發船舶司抽分不許越投他處船司各船司亦不許互指他處船司船商如本處船司依見定例抽稅訖從船商發賣與搬販客人亦依舊例

就於所在船司請給公遣從便於各處州縣依
例投稅貨賣其原指所往番邦國土如有不能
得到所指去處委因風水打往別國就博到別
國物貨至回帆抽分時取問同伴在船人等相
同別無虛誑依例抽分如中間詐妄欺瞞官司
許諸人首告是實依例斷沒告人給賞 一船
商請給公驗依舊例召保船牙人保明牙人招
集到人伴幾名下船收買物貨往某處經紀公
驗開具本船財主某人綱首某人直庫某人梢

工某人雜事等某人部領等某人伴某人船
隻力勝若干檣高若干船面闊若干船身長若
干每大船一隻止許帶小船一隻名曰柴水船
合給公憑如大小船所給公驗公憑各仰在船
隨行如有公驗或無公憑卽是私販許諸人告
捕給賞斷罪所載柴水船於公憑內備細開寫
亦於公驗內該寫力勝若干檣高若干船面闊
若干船身長若干不到物力戶某人委保及與
某人結爲一甲互相作保如將帶金銀違禁等

物下海并將奸細歹人回船并元委保人及同
甲人一體坐罪公驗後空紙八張泉府司用訖
印信於上先行開寫販去物貨各各名件斤重
若干仰綱首某人親行填寫如到彼國博易物
貨亦仰綱首於空紙內就地頭即時日逐批寫
所博到物貨名件色數斤重至船司以憑照數
點秤抽分如會停泊他處將販到物貨轉變滲
泄作弊及鈔填不盡或因事發露到官卽從漏
船法斷沒保明人能自首告將犯人名下物貨

以三分之一給與充賞如船司官吏容庇或覺
察得知或因事發露到官定將官吏斷罷不敘
所給公驗行泉府司置半印勘合文簿立定字
號付綱主某人收執前去某處經紀須要遵依
前項事理所有公憑小船並照公驗一體施行
一番船南船請給公憑公驗回帆或有遭風
被劫事故合經所在官司陳告體問的實移文
市舶司轉申總府衙門再行合屬體復如委是
遭風被劫事故方與銷落元給憑驗字號若妄

稱遭風等搬擄船貨送所屬究問斷沒施行或有沿途山嶼灘嶼與海岸停泊汲水取柴恐有稍碇水手搭客等人乘時懷袖偷藏貴細貨物上岸博易物件或有船商之家回帆將市船司私用小船推送食米接應船船卻行輒取貴細貨物不行抽解卽是滲泄並許諸人告捕餘行斷沒犯人杖一百七下告捕人於沒官物內三分之一給賞仍行下沿海州縣出榜曉諭嶼嶼等處責在官吏巡檢人等常切巡捉催趕船隻

隨卽起離彼處不許久停直至年例停泊如東門山等具呈各處市船司廉能官封堵坐押赴元發船市船司又行差官鑿搬上船檢空船隻搜檢在船人等懷空方始放令上岸如在番阻風經冬不還者次年回帆取問同船或同伴船隻人等是實依例抽分若使妄稱風水不便轉指買賣許諸人首告依例斷沒告人給賞一海商不請驗憑擅自發船船並許諸人告捕犯人斷罪船物沒官於沒官物內以三分之一充

賞犯人杖一百七下如已離船司卽於沿河所
在官司告捕依上追斷給賞 一海商所用兵
器并銅鑼作具隨住船處具數申所屬依例寄
庫起船日給 一海商每船募綱首直庫雜事
部領梢工碇手各從便具名呈市船司申給文
憑船請公印爲記人給五名爲保 一海商貿
易物貨以船司給籍用印關防具注名件斤數
綱首雜事部領梢工書押回日以物籍公驗納
市船司 一海商自番國及海南買販物貨到

中國雖赴市船司抽分而在船巧爲藏匿者卽
係漏船正行沒官仍許諸人告首依例給賞犯
人斷罪 一金銀銅錢鐵貨男子婦女人口並
不許下海私販諸番物如到番國不復前來亦
於元齋去公驗空紙內明白開除附寫緣故若
有一切違犯止坐船商船主 一市船司招集
船商船隻行省行下衙門無得差占及有新造
成船舶之家本欲過番興販經紀亦是抽取課
程並仰籍定數目今後並不得將上項船隻差

占有妨船商興販經紀永爲定例以示招徠安
集之意 一各處市船司每年辦到船貨除合
起解貴細之物外據其餘物色必須變賣者附
近杭州各司船貨每年不過當年十二月終起
解赴杭州行泉府司官庫交割船司畫時開數
具呈行省令有司隨卽估體時價比至次年正
月終須要估體完備行省預爲選收 一見今
船商去來不定多在海南州縣支泄細貨仰籍
定姓名仍令海南海北廣東道沿海州縣鎮市

地面官司用心關防如遇回船船隻到岸常切
催趕起離前赴市船司抽分如官吏知情受賂
容縱如或覺察得知定是依條斷罪 一船商
梢水人等皆是辦課程之人落後家小合示優
恤所在州縣並與除免雜役 一夾帶南番人
將帶船貨者仰從本國地頭於公驗空紙內明
白備細填附姓名物貨名件斤重至市船司照
數依例抽稅如番人回還本國亦於所坐番船
公驗內附寫將去物貨不致將帶違禁之物仍

差諳練錢穀廉幹正官發賣其應賣物貨將民間必用并不係急用物色驗分數互相配合須要一并通行發賣管限四月終了畢並不許見任官府權豪勢要人等詭名請買違者許令諸人首告得實將見獲物價盡數沒官斷罪於沒官價內一半付告人充賞仍令拘該肅政廉訪司體察外有泉府廣東兩處市舶司相離杭州地里寫遠依上差官就彼一體發賣 一行省行泉府司市舶司官每歲若至船舶回帆時月

預期前去抽解處所以待船舶到來依例封堵檢次先後隨時抽收不得因而走透作弊其監抽官員亦不得違期前去停滯船舶 一船舶商下海開船之際合令市舶司輪差正官一員於船舶開岸之日親行檢視各各大小船內有無違禁之物如無夾帶即時開洋仍取檢視官結罪文狀如將來有人告發或因事發露但有違禁之物及因而非理騷擾船舶商取受作弊者檢視官並行斷罪肅政廉訪司臨時體察 一抽

分市舶關防節目若有該載不盡合行事理行
省行泉府司就便斟酌事宜從施行 一定到
舶法抽分則例關防節目仰行省行泉府司各
處市舶司所在官員奉行謹守不得減裂違犯
行御史臺廉訪司常加體察毋致因循廢弛元典
章

謹按元典章所載尚有泉福物貨單抽分一
條以非廣東市舶事例故不備錄

合刺普華改廣東都轉運鹽使兼領諸番市舶

時惠州負販之徒萬人為亂討捕之元史本傳

卜天璋陞廣東廉訪使先是豪民瀕海築堰專

商舶以射利累政以賂置不問天璋至發卒決

去之元史本傳

明

明洪武初設市舶司於太倉黃渡三年二月罷
之凡番舶至太倉者命軍衛有司封籍其數送
赴京師尋復設市舶司於浙江福建廣東浙江
通日本福建通琉球廣東通占城暹羅西洋諸

國續文獻
通考

謹按其時置驛於浙江福建廣東三省以待市舶之至者在廣東者曰懷遠驛

洪武二年九月定朝貢附至番貨欲與中國貿易者官抽六分給價償之仍免其稅明實錄

謹按邱濬大學衍義補言明雖沿前代市舶司之名而無抽分之法今考實錄則明初卽定抽分其後又有抽十分之五有抽十二者邱濬考之未審也

明除元亂定諸番例三年一貢世見來王許以互市立市舶提舉司以主諸番入貢舊制應入貢番先給以符簿凡貢至三司以合符視其表文方物無偽乃送入京若國王王妃陪臣等附至貨物抽其十分之五其餘官給之直暹羅爪哇二國免抽其番商私齎貨物入爲易市者舟至水次悉封籍之抽其十二乃聽貿易然閩廣奸民往往有椎髻耳環效番衣服聲音入其舶中導之爲奸傍海甚苦之郡國利病書

洪武二十七年以海外諸夷多詐絕其往來惟
琉球真臘暹羅許入貢而緣海之人往往私下
諸番貿易香貨因誘蠻夷為盜命禮部嚴禁絕
之明實錄

永樂元年八月帝以海外番國朝貢附帶貨物
交易者須有官專主之遂命吏部依洪武初制
於浙江福建廣東設市舶提舉司隸布政司明實錄

謹按洪武時已設市舶司至是乃定為提舉

一員副提舉二員吏目一員

永樂元年八月西洋瑣里國王遣使貢附載胡
椒與民互市有司請征稅命勿征又刺泥國回
回哈只馬哈沒奇刺泥等入貢因附載胡椒與
民互市有司請征其稅亦不聽續文獻通考

永樂四年六月廣東布政司奏每歲海外番夷
入貢方物水路以舟楫運載惟南雄至南安限
隔梅嶺舟楫不通請用民力接運上曰番貢無
定期而農民少暇日自今番夷入貢如值農務

之時其方物並於南雄收貯俟農隙運赴南安
明實錄

景泰三年五月瓜哇國使臣乞以賜物貿易油
麻之類於廣東許之
續文獻通考

成化十七年暹羅貢使還至中途竊買子女及
私鹽命遣官戒諭諸番
憲宗本紀

宏治十年暹羅國入貢時四裔館無暹羅譯字
官閣臣徐溥請移牒廣東訪取能通彼國言語
文字者赴京備用從之
孝宗紀

先是暹羅占城瓜哇琉球浣泥諸國互市俱在
廣州設市舶司領之正德時移於高州之電白

縣明史外
國傳

正德四年暹羅船有飄至廣東者市舶中官熊
宣與守臣議稅其物詔斥宣妄攬事權撤還
明史

食貨志

正德十年暹羅國進金葉表朝貢館中無識其
字者閣臣梁儲請選留其使一二人入館肄習

報可
明史外
國傳

正德十二年西海夷人佛郎機亦稱朝貢突入
東莞縣大銃迅烈震駭遠邇殘掠甚至炙食小
兒海道奉命誅逐乃出境自是海舶悉行禁止
例應入貢諸番亦鮮有至者貢舶乃往漳泉廣
城市貿蕭然非舊制矣於是兩廣巡撫都御史
林富稽祖訓遵會典奏上得允於是番舶乃通
焉灣泊有定所抽分有定例俸糧折色椒木兼
支嘉靖中革去市舶內臣船至澳遣知縣有廉
幹者往船抽盤提舉司官吏亦無所預

郡國利
病書

嘉靖元年暹羅占城貨船至廣東市舶中官牛
榮縱家人私市論死如律萬曆時紅毛番築土
庫於大澗東佛郎機築於大澗西歲歲互市中
國商旅亦往來不絕

明史食
貨志

嘉靖元年給事中夏言上言倭禍起於市舶禮
部遂請罷市舶而不知所當罷者市舶太監非
市舶也夷中百貨皆中國不可缺者夷必欲售
中國必欲得之以故祖宗雖絕日本而三市舶
司不廢蓋東夷有馬市西夷有茶市江南海夷

有市舶所以通華夷之情遷有無之貨收征稅之利減戍守之費又以禁海賈抑奸商使利權在上罷市舶而利取在下奸豪外交內訶海上無安日矣

明會典

嘉靖九年巡撫林富乞裁革珠池市舶內臣疏言廣東濱海與安南占城等番國相接先年設有內臣一員盤驗進貢方物臣以爲市舶太監不必專設以貽日朘月削之害市舶乞改巡視海道副使帶管待有番船至澳卽同提舉等官

督率各該管官軍嚴加巡邏其有朝貢表文見奉欽依勘合許令停泊者照例盤驗若自來不曾通貢生番如佛郎機者則驅逐之少有疎虞聽臣糾察庶幾事體歸一而外患不生若欲查照浙江福建事例歸併總鎮太監帶管似亦相應但兩廣事情與他省不同總鎮太監住劄梧州若番舶到時前詣廣東省城或致久妨機務所過地方且多煩擾引惹番商因而輒至軍門不無有失大體故臣愚以爲不如命海道副使

帶管之便也

郡國利病書

嘉靖十一年五月巡按林有孚疏言鎮守內臣之害兵部尙書李承勛覆議大學士張孚敬力持之遂革鎮守並市舶守珠池內臣皆革之一時稱快

明史食貨志

嘉靖三十九年鳳陽巡撫唐順之議復三市舶

司部議從之

明史食貨志

唐順之云國初浙福廣三省設三市舶司在浙江者專爲日本入貢帶有貨物許其交易在廣

東者則西洋番舶之輳許其交易而抽分之若福建旣不通貢又不通舶而國初設市舶之意浸不可考矣舶之爲利也辟之鑿然封閉則國收其利權而自操之是爲中策不閉不收利孔漏洩以資奸宄嘯聚其間斯無策矣今海賊據浯嶼南嶼諸島公然通番舶之利而中土之民交通接濟殺之而不能止則利權之在下也宜講求國初設立市舶之意無洩利孔使奸人得乘其便其於海禁利害晰如也然市舶之與商

舶其說稍異市舶者諸夷船舶無近地與內地民互爲市若廣之濠鏡澳然商舶者蓋土著民釀錢造舟裝土產徑望東西洋而去與海島諸夷相貿易其出有時其歸有候廣洋巨浸船一開帆四望惟天水相粘茫無畔岸而海人習知海道者用指南針卽羅經也爲其導向相傳有航海針經針或單用或指兩辰間以前知某洋島所在約更時當行水路幾許打量水深淺幾托方幾托爲幾海中島嶼作何狀某洋礁險宜慎或風

雲氣候不常以何法趨避之異時海販船十損

二三及循習於常所來往舟無恙若安瀾焉蓋

海濱民射利精知如此東洋若呂宋蘇祿諸國

西洋暹羅占城諸國及安南交趾皆我羈縻屬

國向無侵叛故商物不爲禁而特嚴禁販日本

者比於通番接濟之例於時凡販東西二洋雞

籠淡水諸番及廣東高雷州北港等處商漁船

引俱海防官爲管給每引納稅銀多寡有差名

曰引稅

東西二洋每引納稅銀三兩雞籠淡水及廣東引納稅銀一兩其後加增東西

洋稅銀六兩雞籠淡水稅銀二兩萬曆十八年革商漁文引歸沿海州縣給發惟番引仍舊

每請引百張為率隨告隨給盡即請繼原未定其地而亦未定其船萬曆十七年巡撫周案議將東西二洋番船題定隻數歲限船八十八隻給引如之後以引數有限而私販者多增至一百十引矣其征稅之規有水餉有陸餉有加增餉水餉者以船之廣狹為準其餉出於船商陸餉者以貨之多寡計值其餉出於鋪商又慮有藏匿禁船商毋輒起資以鋪商所接買貨物應

稅之數給號票令就船完納而後許粥賣焉西

船面潤一丈六尺以上者征餉銀五兩每多一尺加銀五錢東洋船頗小量減西洋十分之三

陸餉胡椒蘇木等類計值銀一兩者征餉銀二分雞籠淡水名曰小番地近船小每船面潤一

尺征水餉銀五錢陸餉亦如東西二洋之例加增餉者東洋中有呂

宋其地無出產番人率用銀錢易貨錢用銀鑄造字用番

文九六成色漳人今多用之船多空回即有貨亦無幾故商

販回澳征抽水陸二餉外屬呂宋船者每船另

追銀百五十兩謂之加增郡國利病書

彭韶遷廣東左布政使中官奉使雜運鎮守顧

恒市舶韋眷珠池黃福皆以進奉為名所至需

求民不勝擾韶先後論奏明史本傳

謹按韋眷事又見陳選及高瑤傳

黃光昇遷廣東海北副使番舶稅重商人百計

求免光昇為奏減十之六商乃樂輸明史本傳

沈思孝授番禺知縣殷正茂總制兩廣欲聽民

與番人互市思孝持不可明史本傳

王希文授刑部給事中稅璫所至暴斂不法而

粵珠池市舶尤甚疏奏罷之香山縣志

張大猷調香山令稅璫李鳳謀駐節縣內大猷

言地近海瘴非稅使所宜居且番情叵測萬一

犯及稅使如朝廷威德何璫沮而止香山縣志

萬曆末年李鳳增粵稅至二十萬粵商苦累百

計求免不得四十一年十月給事中郭尙賓奏

捧誦聖旨李鳳既已久病垂危着在任調理不

准辭所收現在稅課并一應錢糧方物等項差

內官阮昇前去暫管欽此伏查兩粵同一體先

年粵西稅監病故皇上命四川稅監兼管今內

臣何敢蒙蔽聖聰不循粵西事例而令阮昇得營接李鳳之差豈以廣東尙堪腴削乎夫粵東非有天雨之粟地出之金異於中州大藩也粵東商民非有計然之積蓄陶朱之多藏比於中州大賈也他藩錢糧惟供本藩粵東協濟粵西兵餉四五萬金他藩地方之患尙緩粵東盜賊之警無處無日不報歲征兵餉兵船銀四十萬兩支給不敷也以浙江福建湖廣大省監稅止各五六萬止因當時粵東撫按失計稅金遂三

四倍於大藩至今尙十八萬金加之商稅不足又派之糧差又派之稻穀又派之宰牛魚蝦菜果等項又派之濠鏡澳貨二萬兩權解十餘年以來商民皮肉已盡脂髓并窮愁苦無聊之狀自撫按司道以至府縣之官無不人人目覩心悲望皇上撤回李鳳脫粵東商民於湯火者見於撫按之屢疏可徵也李鳳初至粵東縱棍徒以掠鄉民所在蠢蠢思亂賴巡按李時華縛其爪牙法繩之鳳始稍戢人心始稍安自後李鳳

時復咆哮粵民屢欲撲殺之亦賴時華禁止李鳳乃得保其首領阮昇不知前車之當戒急作李鳳之後身營求內援立取中旨一時傳宣舉朝無不駭愕今粵東望照粵西事例帶管而不可得且旨內又無不許騷擾地方之語將聽阮昇爲所欲爲耶目前慮澳夷之叵測澳夷亦雄據以相持不過爲此二萬餉金耳權此不能益內帑之毫毛減此可以圖夷人之徙舍夷人已成尾犬不掉之勢皇上乃恡二萬餉金之蠲以

忘國恤皇上之自爲謀與爲皇上謀者能恣然視爲無害耶四十二年二月給事中郭尙賓奏舊年稅監李鳳物故蒙皇上察廷臣言不委阮昇止命閩監高宗兼管粵東聞命之日歡聲動地詎意奉旨兼管會幾何時高宗輒聽棍徒唆撥而有移住粵東之望福建巡撫袁一驥乃言近因廣東稅監李鳳病故已奉旨代爲督理該監方欲移住彼處或姑聽其便夫粵東民非衆於他藩地非廣於他藩然粵東一年之稅他藩

三四年之稅也江西七萬而四萬取之贛關福建六萬而三萬取之東西二洋乃粵東取二萬於澳夷猶不足額每年湊解十六萬無一非民膏民脂也近蒙聖恩捐減二萬粵民喜躍欲狂然二萬之減在他藩當爲曠蕩之恩施在粵東僅爲太甚之稍去糧差之加減如故而杼軸日空一日牛米雞豚菜果之苛斂如故而關市日擾一日盜賊日繁一日軍興之費日增一日粵民困苦至此高案卽令營得入粵然已無可腴

之民膏祇有不可輕犯之民怒入粵何益於案也傳聞棍徒自粵走閩爲該監畫策該監爲棍徒所用欲求一饜足於粵而忍心於此一驥復導之爲擇食之梟明背兼管之新綸陰堅遣瑞之弊政臣以爲高案在閩坐而虛糜在粵東飛而肆虐坐而虛糜不可也飛而肆虐尤不可也惟并撤高案而付各稅於有司則爲閩也實所以爲粵也乃臣更有請焉粵東尙征十六萬雖云勢難驟減談者不謂粵民之易虐而謂粵力

之能供權之者不憂力之已殫而憂數之少絀
粵民之無告久矣有如大賜減免令粵民得比
他藩稅額則聖治民生兩大有裨璫輩亦當不

萌覬覦又何營求移住鄰國哉

香山縣志

鄭和經事三朝先後七奉使所歷占城瓜哇真
臘舊港暹羅古里滿刺加渤泥蘇門答刺阿魯
柯枝大葛蘭小葛蘭西洋瑣里加異勒阿撥把
丹南巫里甘把里錫蘭山喃渤利彭亨急蘭丹
忽魯謨斯比刺溜山孫刺木骨都束麻林刺撒

祖法兒沙里灣泥竹步榜葛刺天方黎伐那孤
兒凡三十餘國所取無名寶物不可勝計

明史宦官

傳

謹按費信作星槎勝覽所記蓋即鄭和下西
洋事而所載國名與鄭和傳間有異同

粵海關志卷四終

